

- रेल मंत्री अश्विनी वैष्णव आज जयपुर-दरभंगा अमृत भारत एक्सप्रेस अर लालगढ़-साबरमती एक्सप्रेस रेल ने हरी झण्डी दिखाई-खातीपुरा मेगा कोच टर्मिनल समेत कई रेल सुविधावां री सौगात दी।
- 12वां अंतरराष्ट्रीय योग दिवस माथे देश-विदेश मांय योगाभ्यास रा कार्यक्रम व्हीया-प्रधानमंत्री नरेन्द्र मोदी कह्यो-योग, मानसिक स्वास्थ्य ऊं शारीरिक स्वास्थ्य रा मार्ग ने दिखावे है।
- प्रधानमंत्री कोलकाता मांय देश मांय बण्या नौसेना रा तीन पोत देश ने सूंप्यो।
- नीट-यूजी-2026 पुनर्परीक्षा देश रा 5 हजार ऊं बत्ती केंद्रां अर विदेश रा 14 केंद्रां माथे करड़ी हिफाजत रे बीचे पूरी व्ही।

000

रेल मंत्री अश्विनी वैष्णव आज जयपुर रा खातीपुरा रेलवे टेशन उं जयपुर-दरभंगा अमृत भारत एक्सप्रेस ने रवाना कर्या। साथे ई वणां खातीपुरा मांय मेगा कोच टर्मिनल रो उद्घाटन कर्यो। ई मौके रेल मंत्री 41 छोटा अर मझला टेशन माथे नुवा प्लेटफॉर्म पसारा अर 16 टेशनां माथे एकीकृत यात्री सूचना प्रणाली रो लोकार्पण ई कर्यो। कार्यक्रम उं पैलां मीडिया उं बतळ मांय श्री वैष्णव कयो के जयपुर शहर री जरूरतां ने देखता मेगा कोच टर्मिनल बणाई ज्यो है। अटै एक महीना मांय कोई साढे चार सौ रेलगाड़ियां रो रख-रखाव व्हे सकेला, जिण मांय आधुनिक गाड़ियां ई भेळी हैं।

-----

ई मौके मुख्यमंत्री भजनलाल शर्मा अर उपमुख्यमंत्री दिया कुमारी मौजूद रिया। मुख्यमंत्री आपरा भाषण मांय कयो के राजस्थान रा रहेवासियां ने आज मिली रेल जाती सुविधावां उं घणो फायदो व्हेला।

-----

रेल मंत्री अश्विनी वैष्णव आज बीकानेर उं जयपुर निरीक्षण रे दौराण सीकर टेशन माथे सुंदरपुरा टेशन बणाई-चुणाई काम री मंजूरी दी अर बेगा उं बेगा काम सरू करण री जानकारी दी। वणां कयो के इण टेशन रे बणण उं खाटूश्याम जी आवण वाळा श्रद्धालुवां ने घणो आराम मिलेगा अर वांरा आवणो जावणो सरल व्हे जाएला। इण उं पैला बीकानेर टेशन माथे व्हीया कार्यक्रम मांय रेलमंत्री बीकानेर उं लालगढ़-साबरमती एक्सप्रेस रेल ने हरी झण्डी दिखाव कर्या। आ रेल गुजरात अर राजस्थान रा सैलाणी ठोड़ा रे बीचे सीधी रेल जुडाव मुहैया करावेला। ई मौके रेलमंत्री कयो के सरहदी हलकां मांय रेल नेटवर्क पूगण उं नीं फगत हलका ने रेल सेवावां मिलेला, बल्कि आ परियोजना सामरिक निजर उं ई महताउ व्हेला। श्री वैष्णव बतायो के राजस्थान मांय 76 हजार करोड़ रिप्या उं बत्ती री रेल परियोजनावां माथे काम चाले। ई दौराण केन्द्रीय कानून मंत्री अर्जुनराम मेघवाल ई मौजूद रिया।

000

दुनियाभर मांय आज 12वां अंतरराष्ट्रीय योग दिवस मनायो जावे। ई साल रो मुद्दो है - **बढ़ती उम्र के प्रभाव को रोकने के लिए योग**। राष्ट्रपति द्रौपदी मुर्मू मध्यप्रदेश रा जबलपुर मांय योगाभ्यास मांय भेळी व्ही। ई मौके राष्ट्रपति कयो के योग भारत री महान परंपरा री निशाणी है, जो स्वस्थ, संतुलित अर सार्थक जीवन रो मार्ग दिखावे है। वणां लोगां उं योग ने आपरा रोज रा कामां रो हिस्सो बणावण री अरज करी। उपराष्ट्रपति सी.पी. राधाकृष्णन लद्दाख रा लेह मांय व्ह्या जळसा मांय हिस्सो लियो। ई मौके वणां लोगां उं स्वस्थ, सुखी अर शांतिपूरण समाज सारू योग ने आपरा दैनिक जीवन रो अभिन्न अंग बणावण री अरज करी। अंतरराष्ट्रीय योग दिवस रा खास कार्यक्रम पश्चिम बंगाल री राजधानी कोलकाता मांय रेड रोड माथे व्हीयो, जठे प्रधानमंत्री नरेन्द्र मोदी योगाभ्यास री अगुवाई करता कयो के सगळा रे जीवन मांय योग एक नुवी ऊर्जा रो संचार करे है। ई दौराण प्रधानमंत्री कयो के योग, मानसिक स्वास्थ्य उं शारीरिक स्वास्थ्य रा मार्ग ने दिखावे है।

-----

लोकसभा अध्यक्ष ओम बिरला संसद परिसर मांय भेळा योगाभ्यास मांय हिस्सो लियो। वठे प्रदेश मांय सगळा जिलां, ब्लॉक अर ग्राम पंचायतां, शैक्षणिक संस्थानां अर आयुष्मान आरोग्य मिंदरां मांय योग कार्यक्रम व्हीया। जयपुर रा एसएमएस रा इंडोर स्टेडियम मांय व्हीया कार्यक्रम मांय राज्यपाल हरिभाऊ बागडे अर उपमुख्यमंत्री प्रेमचंद बैरवा समेत केई मानेता लोग मौजूद रिया।

सिरोही रा आबूराज मांय व्हीया भेळा योगाभ्यास मांय मुख्यमंत्री भजनलाल शर्मा ई योग कर्यो। ई मौके मुख्यमंत्री कयो के योग नीं फगत शरीर अर मन ने जोड़े है, बल्कि दुनिया ने जोड़ण रो काम ई करे है। बीकानेर रा करणी सिंह स्टेडियम मांय केन्द्रीय मंत्री अश्विनी वैष्णव योग शिविर मांय योगाभ्यास कर्यो। ई दौरान केन्द्रीय कानून मंत्री अर्जुन राम मेघवाल ई मौजूद रिया। आयुष मंत्रालय कानी उं जयपुर रा जंतर-मंतर माथे भेळो योगाभ्यास करीज्यो। इण मांय 18 देशां रा पढेसर भेळा व्हीया। बाड़मेर रा आदर्श स्टेडियम मांय जिला थर रो कार्यक्रम व्हीयो। वठे ही राजसमंद झील री नौ चौकी पाल माथे व्हीया योगाभ्यास कार्यक्रम मांय सांसद महिमा कुमारी अर लोगां उमाव रे साथे हिस्सो लियो। सवाईमाधोपुर मांय केन्द्रीय संचार ब्यूरो कानी उं योगाभ्यास, योग संगोष्ठी अर प्रश्नोत्तरी कार्याक्रमां रो आयोजन करी ज्यो। पाली मांय जिला थर रो भेळो योग कार्यक्रम नाकोटिया उद्यान मांय व्हीयो।

000

राज्यपाल हरिभाऊ बागडे कयो है के योग आपां रा मन, शरीर अर आत्मा री एकता उं जुड़्यो है। ओ हर उमर मांय शारीरिक, मानसिक अर आध्यात्मिक स्वास्थ्य ने चौखो बणावण माथे केन्द्रित है, जिण उं लोग लम्बा बगत ताई सक्रिय अर स्वस्थ रह सके। जयपुर रा बिड़ला सभागार मांय आरोग्य महोत्सव मांय बोलता वणां कयो के योग एक दिन नहीं बल्कि पूरी दुनिया मांय अबे स्वास्थ्य सारु एक आंदोलन बण चुक्यो है। वणां योग ने जीवन री आदत बणावण री अरज करी।

000

प्रधानमंत्री नरेंद्र मोदी आज कोलकाता उं देश मांय बण्या भारतीय नौसेना रा तीन पोत – आईएनएस दुनागिरी, आईएनएस संशोधक अर आईएनएस अग्रय ने देश ने सूप्या। ई मौके वे कयो के भारत जहाज बणावण रा हलका मांय नुवी सोच रे साथे आगे बध रियो है। प्रधानमंत्री कयो के केंद्र सरकार अजे रा सालां मांय केई नीतिगत सुधार करया है अर घरु बणावण रा बूता ने बधावण सारु खास कदम उठाई ज्या है।

-----

नौसेना मुजब, आं पोतां मांय 75 फीसदी उं बत्ती देशी चीजां ने काम मांय लीरीजी है। प्रधानमंत्री कयो के जहाज बणावण अर मरम्मत ने राष्ट्रीय मिशन रा रूप मांय विकसित करयो जावे। वणां कयो के समुद्री हलका मांय आवण वाळा बगत मांय लाखों रोजगार बणाया जा सके है।

000

मुख्यमंत्री भजनलाल शर्मा सिरोही रा आबूराज ने सैलाणी, आध्यात्मिक अर पर्यावरण री खासियतां मुजब सम्पूर्ण विकास रो ब्लूप्रिंट तियार करण सारु हुकम दीया है। वणां विकास कामां ने तालमेल रे साथे बगतसर पूरा करण अर संभागीय आयुक्त अर मुख्य सचिव ने बरोबर मॉनिटरिंग करण रा निर्देश दिया। श्री शर्मा आज आबूपर्वत विकास समिति री मीटिंग री सदरत करता कयो के आबूराज मांय शहरी विकास, सड़क, पार्किंग, आवण जावण सारु विश्व थर री सुविधावां विकसित करी जावे, जिण उं बत्ती उं बत्ती सैलाणी आ सके। वणां कयो के विवेकानंद पार्क अर गुरु शिखर रा सौंदर्यकरण, अर्बुदा माता मिंदर अर दत्तात्रेय मिंदर रा विकास कामां, ईवी वाहनां ने बधावो देवण अर भारत माता नमन स्थल ने नमो उद्यान रा रूप मांय विकसित करण समेत न्यारा-न्यारा कामां उं आबूराज ईको फ्रेंडली बण सकेला। मुख्यमंत्री आज गुजरात रा मां अम्बाजी शक्तिपीठ मांय दर्शन करने प्रदेश री खुशहाली री कामना करी। ई मौके खबरनवीसां उं बतळ मांय वणां कयो के प्रधानमंत्री नरेन्द्र मोदी री कोशिसां रे कारण ई आज विदेश मांय ई योग दिवस पूरा उमाव रे साथे मनाई ज्यो।

000

राष्ट्रीय पात्रता सह-प्रवेश परीक्षा-नीट यूजी री पुनर्परीक्षा आज करडी हिफाजत रे बीचे देश रा 5 हजार उं बत्ती केन्द्रां अर विदेश रा 14 केंद्रां माथे व्ही। 22 लाख 79 हजार उं बत्ती पढेसर परीक्षा मांय भेळा व्हीया। ई बार पढेसरा ने नुवा प्रवेश पत्र अर मान्यता वाळा फोटो पहचान पत्र उं ई प्रवेश दीरीज्यो। एनटीए मुजब, नीट-यूजी पुनर्परीक्षा देश रा 551 शहरां अर 14 विदेशी शहरां मांय व्ही। अठीने, प्रदेश मांय नीट पुनर्परीक्षा सारु 25 जिलां मांय 577 परीक्षा केन्द्र बणाई ज्या। जयपुर रा 103 परीक्षा केन्द्रां माथे कुल 37 हजार 108 पढेसर भेळा व्हीया। ई बार पढेसरा ने 15 मिनिट रो बत्ती बगत दीरीज्यो, इण उं परीक्षा 180 मिनिट उं बधने 195 मिनिट ताई व्ही।

000

प्रदेश रा न्यारा-न्यारा हलकां मांय आथूणी विक्षोभ रा असर उं तेज हवा रे साथे बिरखा व्ही। जयपुर मांय आज संवारा हळकी बिरखा व्ही। वटे ई श्रीगंगानगर जिला मांय तेज बिरखा रे साथे कुछ ठोड़ा ओळा ई पड्या। कोटा मांय दोपारां पछे तेज अंधड़ रे साथे मेह बरस्यो।

मौसम महकमो आथूणी विक्षोभ रा असर उं आवता चौबीस घंटां मांय बीकानेर, जयपुर, भरतपुर, अजमेर अर कोटा संभाग मांय कुछ ठोड़ा साथे शेखावाटी हलकां मांय मेघगर्जन अर आंधी रे साथे मझला उं तेज बिरखा होवण री आस जताई है। 22 उं 25 जून ताई आंधी-बारिश री गतिविधियां चालता रेहवण री आस ई जताई है।

000

आज विश्व ऊँट दिवस है। ई मौके केंद्रीय संस्कृति अर सैलाणी महकमा रा मंत्री गजेंद्र सिंह शेखावत देशवासियां ने शुभकामनावां दी है। सोशल मीडिया माथे आपरा संदेश मांय श्री शेखावत कयो के ऊँट फगत आजीविका रो साधन नीं है, बल्कि राजस्थान अर गुजरात री संस्कृति अर रीत री ई निशाणी है। वणां ऊँट ने मरुस्थल रो जहाज बतावता इण ने बचावण री अरज करी।

000

प्रधानमंत्री नरेन्द्र मोदी 28 जून ने आकाशवाणी रा “मन की बात” कार्यक्रम मांय आपरा विचार साझा करेला। आ ई मासिक रेडियो कार्यक्रम री 135वीं कड़ी व्हेला। ई सारु सुणण वाळा आपरा सुझाव टोल-फ्री नम्बर 1800-11-7800 माथे भेज सके है। नरेन्द्र मोदी एप अर माय जीओवी ओपन फोरम री मार्फत ई विचार भेज्या जा सके है। ए सुझाव 26 जून ताई भेज्या जा सके है।

000